

Pa garantisa un futuro pa e Shoconan

A renoba esfuerso pa Shoco endemico di Aruba, cu ta den peliger di extincion

E aña aki a reactiva esfuersonan di conservacion di Shoco, e cual a ser interumpi pa pandemia di Covid-19 segun loke Aruba Birdlife Conservation a informa.

Den ultimo añanan, Shoconan ta bin enfrentando desafionan cada biaha mas grandi na luganan di reproduccion sigur y adecua na varios area di e isla.

Tera Cora, e zona patras di campo di golf di Tierra del Sol, algun biaha tabata un zona di biodiversidad halto y tambe tabata un di e luganan di reproduccion mas importante pa Burrowing Owl (*Athene cunicularia arubensis*) localmente yama "Shoco."

Na 2019, pa mehora e posibilidadnan di supervivencia di e Shoco, a instala e 20 prome neishi artificial na e campo di golf na Tierra del Sol. E motibo principal di brinda na e Shoconan e oportunidadnan di reproduccion alternativo tabata e destruccion sistematico di nan neishi natural na Tera Cora, debi na uso no regula di actividadnan di UTV y ATV.



Mas di 90% di nan neishi natural na Tera Cora a ser destrui den algun aña, despues di introduccion di turismo di aventura y te e fecha hopi Shoco ta muri pa e coremento imprudente di autonan todo tereno. Ta conoci cu tanto na nivel internacional como local, turismo insostenibel di Aruba, incluyendo e asina yama turismo di "aventura" a yega na un costo hopi halto pa medio ambiente y biodiversidad di e isla.

Na cuminsamento di e aña aki, a inicia discusionnan cu e doñonan nobo di e cancha di golf pa loke ta trata e proyecto di conservacion di Shoco existente. E doñonan nobo, e grupo Iberostar, a bay

di acuerdo pa sigui sostene e proyecto y ta compromete na hib'e un stap mas leu. Mantencion lo ta realisa riba e neishi artificial existente segun cu e cancha di golf ta pasa den renobacion y mehoracion, y 12 neishi artificial nobo lo ser agrega na luganan sigur rond di e cancha di golf aumentando e cantidad total na 32.

E proyecto specifico di conservacion di Shoco aki, dirigi pa Aruba Birdlife Conservation, lo ta integra den e diseño y marca nobo di e cancha di golf, treciendo un componente educativo como parti di e experiencia general pa e golfistanan.

Informacion tocante e

proyecto di conservacion di Shoco lo ta disponibel na e pro shop y riba medionan social, yudando pa conscientisa e bishitantenan, golfistanan local, y personal, cu lo ser entrena pa contesta e hopi pregunta cu bishitantenan hopi biaha tin. E iniciativa aki lo engrandece e experiencia general di golf di Aruba pa bishitantenan y localnan mientras ta duna na e Burrowing Owl den peliger di extension un miho chens di sobrevivi.

E introduccion di neishinan artificial di Shoco na Aruba ta forma parti di e Conservacion di Shoco Programa, un iniciativa cooperativo cu a cuminsa na 2017 entre e NGO local su Aruba Birdlife Conservation y Fundacion Conservacion di Aruba, ademas di The Global Owl Project (U.S.A.). Den e proximo añanan, tin plania pa pone mas cueba artificial rond di e isla, brindando na e Shoconan cu oportunidadnan di cria adicional y mas sigur segun cu e isla ta sigui desaroya.

Den e potret ta mostra e bolutarionan di Aruba Birdlife Conservation, cu sosten di personal di Tierra del

Sol-Iberostar, cu a cuminsa construi neishinan artificial nobo, cu pronto lo ser instala rond di e cancha di golf.

E Shoco, of Aruba Burrowing Owl, ta un sub-especie enemigo y su existencia ta seriamente menasa cu un calculacion di 200 par di cria of menos. Na 2012, e Shoco a ser declara un simbolo nacional di Aruba y e prikichi na 2017 como e parha nacional, di e 270 especienan di parha registra na Aruba, e shoco y e prikichi ta e unico dos especienan endemico di Aruba.

Por a recorda cu na 2019, expertonan di "Global Owl Project" a duna dos tayer na Aruba. Aruba Birdlife Conservation su intencion tabata pa ubica 500 neishi artificial na diferente parti rond di Aruba den transcurso di añanan, pero manera a mencionan anteriormente, esaki a stop pa via di pandemia.

Mas leu ta ser calcula cu e shoco tabata na Aruba pa mas di un miyon y mei di aña, hopi mas prome cu e ser humano a pone pia riba nos isla, unico isla na Reino Hulandes cu tin e existencia di shoco.

Siman pasa tabatin basta movecion pa Cuerpo di Polis, cu a atende varios incidente

Fin di siman cu a pasa, Cuerpo Policial ta basta activo riba caya na unda nan a informa tocante diferente incidente cu a tuma luga, entre nan un homber cu a ser alcanza pa un tiro na su curpa na Pos Chiquito.

Diabierna ultimo, mediante un comunicado Cuerpo di Polis a informa cu un homber di 22 aña tira na Betonicastraat y tin dos detencion. Diabierna pa 8:43 di anochi central di polis ta wordo notifica di un caso di tiramento. Segun e prome informe cu un homber lo mester a yega un cas na Betonicastraat cu tiro na curpa.

A despacha diferente unidad di polis na e sitio di e sucedido como tambe a avisa ambulance.

Na yega di e prome unidad policial a acumula informacion di e victima. E victima ta informa polis cu un auto color shinishi y un auto suv

color preto lo a para y despues personanan a baha di e auto y a los diferente tiro riba e grupo na unda e victima tabata cu ne. E victima a wordo alcanza pa e tiro na su curpa.

Recherche como tambe departamento tecnico a presenta na e sitio pa asina haci nan investigacion. Ambulance a trata e victima y a hib'e hospital pa atencion medico avansa. E victima su situacion tabata stabiel.

Un rato despues unidad di motorisa como tambe K-9 Unit ta topa cu un auto marca Hyundai Getz color shinishi na unda a bay over pa stop e pa controla. E auto Getz a cuminsa core pa polis y na unda ta dal den dos auto y sigui bay direccion rotonde Pos Chiquito. Unidad motorisa a logra para e auto y na unda 4 persona masculino ta baha di e auto y huy pa polis. Polis a logra detene 2 sospechoso y a logra haya un

arma di candela tambe. E auto Getz a keda confisca tambe pa mas investigacion.

Diabierna ultimo den oranan di atardi Unit Narcotica a tene un accion policial un biha mas pa loke ta trata benedimento di droga.

Unit Narcotica a haci dos entrada hudicial, un na Milonstraat y e otro na Pindastraat. Na Milonstraat a detene e persona di inicial Q.N.S.H.P di 42 aña y na Pindastraat a detene e hende muhe di inicialnan R.T.T di 59 aña, un otro hende muhe D.J.H.P di 39 aña y e hende homber S.A.A.S di 23 aña.

Na e entrada hudicial a haya diferente droga entre otro cocaína, marihuana y xtc.

Durante e entrada hudicial diferente departamento di Cuerpo Policial a forma parti entre otro Team di Aresto, Flex team y Polis uniforma. Nan a informa cu e ac-



cionnan aki lo continua y no ta descarta cu lo tin mas detencion.

Ademas, siman pasa Departamento di Crimen Organisa (UGC) a dal baho mundo un golpi pisa, unda team di aresto a haci tres entrada hudicial conhuntamente cu diferente departamento policial.

E casnan na unda a haci e entrada hudicial tabata Ponton, Savaneta y Seroe Janchi. Durante e entrada hudicial a detene 4 sospechoso. Ta trata di inicialnan R.F.D.P, K.A.C, D.E.R.A y L.A.R.T. A confisca un cantidad grandi di droga, telefon, drone, parinnan di drone y dos auto.

Durante e accion aki diferente departamento a yuda, entre otro Team di Aresto,

Flex-team, Mobiele Eenheid, Polis forensico y Ministerio Publico.

Y finalmente, diasabra ultimo den oranan di merdia Unidad Motorisa a tene nan control riba diferente puntonan strategico pa asina haci control riba e velocidad den trafico.

Den esaki, a controla 200 auto, den total di 31 chauffeur a haya multa pa mancha cu velocidad halto y a detene un chauffeur pa mancha bao influencia.

Controlnan lo sigui durante fin di siman y ta haci un apelacion na tur automobilistanan pa nan tin nan papelnan di auto na ordo como tambe nan rijbewijs.